



01. marts 2024

UPA2024/69

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

**Nunatta imartaani angalasut tamarmik EPIRB-mik, piunasaqaatit, peqalernissaat anguniarlugu Naalakkersuisut naalagaaffimmut saaffiginnissuteqarnissaat pillugu Inatsisartut aalajangiiffigisassaattut siunnersuut.**

(Inatsisartunut ilaasortaq Doris Jakobsen Jensen, Siumut)

**Tungavilersuut:**

Alianaqisumik ukiut tamaasa misigisarparput, nunaqqatigut immami angalatillutik ujaarineqartut ilaallu nanineqangitsoortut ajunaarsimasulluunniit qujanartumilli aamma ujaarineqartut nanineqartarput.

Nunatsinni inuussutissarsiutitta pingaarnersaraat aalisarneq, taamaattumik immakkut angallanneq nunatsinni avaqqunneqarsinnaanngilaq pingaarutilerujussuullunilu. Taamatut oqareerlunga isumaqarpunga sillimaniarneq sukaterneqartariaqartoq. Assersuutigiinnarlara ujaarlertoqartillugu timmisartut qulimiguullit aammalu alapernaarsuutit suluusallit atorlugit ullormut tiimerpassuit ujaasisoqarpat tamanna inuiaqatigiinnut akikitsuinnaasanngitsoq takorloorneqarsinnaavoq.

Qularnanngilluinnartumik sillimaniarneq aammalu atortorissaarutit pitsaannerusut nunatta imartaani angalasut tamarmik atortarpatigit, inuit inuunerisa annaanneqartarnerat annertunerusinnaagaluarpoq aammalu ajutoortoqartillugu sukkanerusumik sumiissusersinnaaneq aqutissiuunneqassagaluarluni assersuutigiinnarlugu EPIRB<sup>1</sup>-qarsimagaanni tiimit, ullut ujaasiffiusut minutsinut apparneqarsinnaapput.

Sineriak angallavigissallugu nuannertaraluaqisoq ajutoornermi peqqarniitsorujussuusarpoq, taamaammatt ujaasinermi atortussat pitsanngorsaataasinnaasut inuunermik annaassinissamut periarfissagissaartitsinerpaajusussat atorneqarnissai siunertaralugu inatsisitigit piunasaqaataasariaqartoq naalagaaffimmut saaffiginnissutigisariaqartoq isumaqarpunga.

Ukiuuneranimi imaanut nakkaraanni tiimerpassuit inuuniartoqarsinnaanngilaq nunatta imartaa nillerpallaarmat amerlanerpaatigullu angalasoqartillugu atallaarsuit puttasinnaasut suli tamatigit atorneqarneq ajorlutik.

---

<sup>1</sup> (Emergency Position Indicating Radio Beacon, ajutuulernerme nassitsissut)



Ilami aqqusinermi angallannikkut qitequersuineq piunasaqaatinngortissinnaagaanni imaani angallannermi EPIRB-eqarnissaq piunasaqaatinngornissaa ajornaviangilaq.

Ass.: angallammik pisinissamut akissaqaraanni, EPIRB kr. 7.500,- missaani akilik taassumalu saniatigut MMSI<sup>2</sup>-mut nalunaarsortinnermut kr. 1.000,- akissaqartoqarsinnaavoq.

Qulaani tunngavilersuutigisakka innersuussutigalugit matumuuna siunnersuutigaara politikikkut piunasaqaasersuisoqartariaqartoq angallatit nunatsinni angalasut tamarmik EPIRB-mik peqalissasut.

**Pisortanut aningaasatigut allaffissornikkullu kingunerisassai:**

Soqanngilaq

**Namminersortunut aningaasaatigut allaffissornikkullu kingunerisassai:**

Soqanngilaq.

**Innuttaasunut aningaasatigut allaffissornikkullu kingunerisassai:**

Inatsimmik allangortitsinerup malitsigisaanik EPIRB-imik atortulersuinnermut atatillugu immikkut aningaasartuuteqalernermit kinguneqarsinnaavoq.

Paasissutissat uani takukkit:

<https://scanmarine.dk/noedsendere>

---

<sup>2</sup> (Maritime Mobile Service Identity)